

Die meer as 90 000 Maties-Alumni verteenwoordig soveel verskillende geslagte en stadiums van die lewe: sommige het pas afgestudeer en trap die wêreld plat op soek na avontuur, sommige bou ernstig aan 'n loopbaan en talle geniet reeds hul aftrede. Vir sommiges, soos ek, is die verskillende fases van ouerskap 'n daaglikse uitdaging - net toe ek dink ek het die fase van pajama drills oorleef, toe tref kinderpartytjies my...

Met twee seuns onder ses jaar oud kry ek dus 'n stewige dosis kinderpartytjies in. Behalwe vir ons eie pogings (onlangs was dit onderskeidelik seerowers en treine) was ons die afgelope tyd by Superman, Spiderman, Woody van Toy Story en 'n rits ander superhelde en animasiekarakters se partytjies.

Ek weet waarvan ek praat as ek sê dat kinderpartytjies senutergend kan raak en verskeie uitdagings vir die ouers van partytjiegangers inhou.

Enkeles hiervan is die koste van die geskenk (wee jou as jy dit waag om 'n goedkoop Oosterse weergawe teen 10% van die prys voor te stel); petrolkoste en jou kinders se aanmerkings oor jou kar.

Omdat die organiseerders van partytjies nie altyd die sportmanak vóór die uitstuur van die uitnodigings raadpleeg nie, maak dit dat mans gewoonlik in die minderheid is by kinderpartytjies.

As dit die dag hulle beurt is om die kinders te vat, kan dit 'n rowwe storie raak! Hier is enkele waarnemings en voorstelle vir die pa's onder ons.

- Dress op. Jou "World's Best Lover"-grassny-T-hemp en tekkies gaan nie deug nie.
- Maak seker jy het 'n plan van aksie om die kinders skoon en aangetrek volgens die tema in die kar te kry.
- Glipsies gebeur. Pak ekstra klere in (ook vir die kinders).
- Moenie na ander kinders se bakore of sproete verwys as jy nie 100% seker is wie se kind is wie s'n nie - alle partytjies het ingewikkelde familiebande.

Wat verder nuttig is, is dat jy kategorieë partytjiegangers moet kan identifiseer. Dit help jou in jou posisionering en om te besluit met watter kinders jy vooraf alliansies wil aangaan. Hier is enkele breë kategorieë.

1. **Die voorbok:** Dis die maatjie wat op die springkasteel spring terwyl dit nog opgeblaas word, die cupcake met die meeste hundreds and thousands op gryp; en, as jy hom (of haar) nie keer nie, maak hulle die geskenke en die tuinslang oop.
2. **Die ladies:** Gewoonlik 'n paar dogtertjies in feetjierokkies en vlerkies op die rug wat net in die verjaarsdagmaatjie se kamer wil speel.
3. **Die hanswors:** Nee, dis nie die verjaardagmaatjie se pa in 'n narpak nie, maar 'n outjie wat asem-benemend aan takke rond swaai en snaakse geluide maak terwyl hy kyk hoeveel jelly babies hy in sy neus kan prop.
4. **Die verslaggewer:** Dis die enetjie wat elke 10 minute kom verslag doen oor wie die ballonne stukkend gestee het, wie sy stuk koek vir die hond gevoer het en wie met skoene aan op die springkasteel spring.
5. **Die professortjie:** Dis die kind wat ure kan staan en kyk hoe 'n miertjie 'n grassie kou en vrae vra soos: "Dink Tannie ook tjoklits maak mammas vet? My Pappa sê so."
6. **Die res:** Die res is daar om te speel en suiker in groteske hoeveelhede in te neem. (Vanaand sit jy twee keer deur Nemo én 'n laataand oorgeklankte karate-fliëk voordat die suiker uit hul gestelletjies is.) Moontlik sien jy jousef in een van hierdie kategorieë. (Of dink jy dat die kategorieë hierbo onheilsPELLEND maklik op jou werksplek toegepas kan word...)

Hoe dit ook al sy, ek bely dat ek dit eintlik vreeslik baie geniet om kinderpartytjies by te woon. Die eenvoudige rede hiervoor is dat kinders nog wéét hoe om te speel. Hulle weet hoe om totaal en al van hulself te vergeet, diep uit hul magies te lag en om fisies op en af te spring van pure plesier - en hulle het nie 'n saak met wat ander mense daarvan dink nie.

Hoekom is dit dan so dat ons nie meer weet hoe om te speel nie? Of net selde iets van die vreugde van 'n properse kinderpartytjie ervaar? Het ons vergeet hoe of onderdruk ons dit net?

Onthou jy die dae van wegkruipertjie speel - die hartklop in die keel van pure opwindung, om nie gevind te word nie? Cowboys en crooks, boomklim, kissing touchers of donkerkamertjie?

Komaan, erken jy sal wat wil gee om net een keer weer saam met jou maatjies jul te verbeel dat die klimraam regtig 'n seerowerskip is: dat jy die wind in jou hare kan voel, die seesout op jou tong, die strale van 'n Karibiese son op jou blaaië en die opwindung van 'n swaardgeveg op hande.

Geniet daai kinderpartytjie en drink die kleintjies se lus vir die lewe in - en vat iets daarvan werk toe.

Groetnis tot volgende keer

Martin

NS It's never too late to have a happy childhood.

Pasop vir kinderpartytjies!



- Maak vooraf seker hoe oud jou kinders is, wat hul gewig en Apgar-telling by geboorte was, wat hul kleuterskooljuffrouens se name is, of hulle eerste woord "mamma", "pappa" of "nee" was en wanneer hulle leer loop het. (Hier is dit nie voldoende om te sê "so in die tweede jaar" nie. Jy moet weet of dit op 11, 12, 13 of 14 maande was). Hierdie tipe inligting kom handig te pas as jy (moontlik die enigste man daar) jou dalk per ongeluk tussen die mammas bevind. Dan moet jy hierdie basics weet - die mammas gáán jou vra.

Verder is posisionering baie belangrik. Vermoedlik die koektafel (jy word dalk gevra om "Veels geluk liewe maatjie" in te sit), onbewaakte tuinslange, die rante van swembaddens en die kombuis. Braai-areas kan ook gevaarlik wees omdat die verjaardagmaatjie se pappa dalk twee Supermans van die dak af moet gaan red en jy vir 'n onbepaalde tyd die braaiwerk sal moet oorneem - onthou jy is opgedress.

Dan moet jy ook seker maak dat jy 'n goeie uitsig oor die slagveld het sodat jy nie 'n sagte teiken is in 'n goed beplande aanval deur 'n bende Spidermans met watergewere nie.

Iets op die hart?

Skryf gerus aan my by media@sun.ac.za of by Die Redakteur: Matieland, Afdeling Kommunikasie en Skakeling, Universiteit Stellenbosch, Privaatsak X1, Matieland 7602. Die faksnommer is (021) 808 3800.